

Vereinstag 2017

Sonntigmorge, 20. Ouguscht, 09.15h:

E munteri Schar vo 11 Turnerinne u Spielerinne trifft sech bim Expressbuffet zur «Fahrt ids Blaue».

Die einte gönne sech no es Kafi u die andere si am rätsle wo dä Usflug äch härefuehrt.

09.37h fahrt üse Zug, d S4 ab Gleis 5 richtig Bälpl...e Fahrt dür ds Gürbetal wo o nid grad alltäglech isch. Ds Bälpl heisst de scho umstige u paar Minute speter isch Ändstation, mir stige ds Wabere us.

Jitz geit üsi Wanderig los ufe Gurte (oder wie d Insider säge - ufe Güsche); nei, nid em Bähni entlang sondern ufem Wanderwäg links ufe düre Wald richtig Aebersold, wo mer sogar es Reh entdecke. Mir luegä uf Bärn abe, zum Bantiger übere u gseh natürlech o Bälpl mi sim Flugplatz.

Nachere guete Stund heimer d Höchi erreicht u am erschte Raschtplatz heimer freie Blick ids Ulmiztal; uf däm Platz gnähmige mir üs o ds mitbrachte Apéro, es Glesli Wiisse (oder zwöi) u chli Snacks drzue.

Drufabe näh mer dr gross Rundwäg «under d Bei»; picknickä tüe mir uf herrlech grosse Steine bim Ussichtsturm. Uf dä 23m-höch Turm ufe göhmer de sälbverständlech o no u gniesse d Rundumsicht....u ds Chrigi het sogar d Stägetritte bis ufe zellt. Jitz göh die einta gärn ids Kafi, die andere schläcke e Glace u d Livia geit uf 'ne Rodelfahrt.

Die witeri Wanderig fuehrt üs dür ds Gurtedörfli abe uf Kehrsatz u dert hei mir churz nach Akunft o grad wieder e Zug zrügg uf Bälpl u witer bis Thun. Vom Bahnhof Thun us loufe mir grad no witer bis ids Rössli Dürrenascht wo mir üs bimene feine Znacht no intensiv chöi unterhalte; d Gspräch si ächt spannend u chönnte grad no bis lang id Nacht ine ga..... aber schlussändlech simer vom Dussesu u Wandere doch müed gnue u verabschiede üs um die achti. Es isch e zfridene, gmüetleche Tag gsi; merci allne wo drbi si gsi, es het gfägt mit öich.

Theres Rohrer